



13. august 2021

UKA2021/46

Inatsisartut suleriaasianni § 33 naapertorlugu matumuuna aalajangiiffigisassatut siunnersuummik imaattumik saqqummiussaqaassaanga:

Ukiut qulit ingerlaneranni ilinniarfinni ilisimatusarfimmilu ilinniartitsisut ikinnerpaamik 80 %-iisa kalaallisut ilinniartitsisalnissaat anguniarlugu periarfissat suunerinik Naalakkersuisut misissuinissaat pillugu Inatsisartunut aalajangiiffigisassatut siunnersuut. Misissuineq UKA2022-mi saqqummiunneqassaaq.

(Inatsisartunut ilaasortaq Inatsisartut Doris J. Jensen, Siumut)

Tunngavilersuutit:

Inuusuttut amerlavallaartut meeqqat atuarianniit soraarummeersimanatik anisartut amerlavallaarput, aamma amerlasuut ilinnialeqqinneq ajorput. Tassunga assigiinngitsunik peqquteqarsinnaavoq. Ilaatigut peqqutaasut ilagigunarpaat atuartut danskisut tuluttullu piginnaasaasa amigarnerat peqqutigalugu ilinnialeqqinnissaq ajornakusoortinneqartartoq, naak ilinniarusuttoqaraluartoq. Tassunga aaqqiissutaasinnaasut ilagisinnaavaat ilinniartitsisut amerlanerusut kalaallisut ilinniartitsisalnissaat.

Ukiopassuarni qineqqusaarutigineqartarpoq kalaallisut oqaaseqartut amerlanerusut ilinniagaqarnissaat. Kisianni qinersineq naammassisorlu oqallinnerillu qaangiukkaangata aarleqqutigineqalartarpoq ilinniagaqassutsip appariartulernissaa. Eqqaasariaqarparput nunarpassuaqarmat nammineq oqaatsit atorlugit inuusuttunik ilinniarfiusartunik, allaat ilisimatusartoqarluni, aammalu nammineq oqaatsit atorneri peqqutigalugit ilinniagaqassuseq appasinnerusutut isigineqarneq ajorluni.

Arlaatigut qanoq iliuuseqarluta aallartittariaqarpugut, aamma pikkorissarnerit imaluunniit ilinniarnerit sulluunniit inuup naleqassusianut qaffassaataasarput. Nunat allat tamatigut sanillersuuffigisariaqanngilagut, taamaattumik immitsinnut aperisariaqarpugut qanoq inissisimanerluta? Qanoq iliorluta inuusuttut amerlanerusut ilinniagalernissaat angusinnaavarput?

Ukiut qulit siumut isigigutta, naatsorsuutigilluinnarpara nunarput, nunat allat assigalugit, nutserinermut atorneqarsinnaasunik digitalimik sakkunik inerisaasimassasoq, taamaasillutik danskisut tuluttullu oqaatsit atorlugit ilinniusiat kalaallisuumut ajornaquteqanngitsumik nutserneqarsinnaalerlutik.

Tamanna angutinnagu pingaaruteqarluinnarpoq misissussallugu iliuutsit suut pisariaqarnersut ilinniarfinni ilisimatusarfimmilu ilinniartitsisut 80 %-iisa kalaallisut oqaaseqartut ilinniartitsisalnissaannut angutserlugu.

Taamatut tunngavilersuuteqarlunga neriutigaara pitsaasumik uummaarissumillu oqallittoqarumaartoq.

Siunnersuutip aningaasatigut allaffissornikkullu pisortanut sunniutai



Nalilernerqarpoq misissuinermut A/C-fuldmægtigimik ataatsimik ukioq naallugu aningaasartuuteqar-toqassasoq, tassalu 500.000 kr.-inik.

Siunnersuutip aningaasatigut allaffissornikkullu namminersortunut sunniutai
Soqanngilaq.

Siunnersuutip aningaasatigut allaffissornikkullu innuttaasunut sunniutai
Soqanngilaq.